



Taulogologo

TOMANATUGA FA'ALEAGAGA MO LE VAITAUSAGA O LE ATEVETU

Tesema—2022

Ua tuanai afega, ua to foi i tua Apolima o le alaga lea o le fiafia ua sao ma uli le folauga o le faatuatua sa taumate i le ete pe tua mani ā. A lele ua to manū, ua gafoa ata o taulelei i lo tou soifua tului ma so matou ola. Ua tafa le ata o le Ana nai Utumoe, ua mavaevae papa ae gagana utulua ua atoa tino o le tama. Ua faatofu i moana ni mala ae sasa'a i mauga le ūa to o faamanuiaga a le Tapaa'u Sili i le Lagi. Malo le soifua manuia ma le lagi e mamā, malo le folau manuia i le faatuatua. Viia le Alii.

Ā, lele ua a'e i fanua le faatamasoali'iga i faiva ma tiute o lena tausaga faa-le-ekalesia ua tuanai atu. Ua totogo malama fou, ua susu'e vaiola ae ufiufi vaiali. Ia alo ane laia tatou aleaga ma sulā le alofa o le Atua. Tatou manuōina faatasi le alofa o le Tama i le lagi, momoli laau i Foga'a e ala i le faamanū, le vi'iga ma le faage'etaga silisili. Faafetai le Atua ua lē afe se atua o le ala i peau laga ma peau faamata'u o galu fatio'o o lenei soifuaga. Ua sopoloa foi le ma'atui ma le ma'agao, ae a le ma'a faalavea aao. Ua i'u manuia lenei tausaga ae fa'ataumuā'ava foi la tatou faigamalaga o le isi tausaga fou faale-ekalesia i le vaitausaga o le Atevetu e tapenaina ai tatou i le soifua mai o lo tatou faaola. Ose vala lelei foi lea tatou te tapenapena ma faufau ai la tatou sa auā le savaliga o le faatuatua o le Kapelanisia mo le tausaga fou. E tonu ai fo'i le ulua'i tala i le Falefā o le Aiga Salemalama o alo o Tagaloalagi e tolu tama ma le tamaita'i. O le ulumatua ua igoa ia Fuafua, soso'o i ai le tama o Faufau, lona tolu le tama o Nafanafa ae ui'i le tamaita'i o Malamalama atoa i ai le ulua'i Falefā o le Aiga Salemalama. O lona uiga o se laolao lelei lenei e toe fuafua, faufau, Nafanafa lo tatou sa ina ia tatou maua Keriso Iesu le Alii o le malamalama.

ATEVETU

O le folauga i le Faamoemoe

“Tepa i le taimi ua fano ma le agaga faatumulia i le loto faafetai, sapaapaia ma le fiafia le taimi nei ma le loto naunauta'i, tepa taula'i i le lumana'i ma le ola e taumasuasua i le faamoemoe ma le

mautinoa” (*looking back with gratitude, embracing the present moment with joy and passion, and looking forward to a future full of hope and confidence*). Feau a Pope Falanisisi i le faamamaluina o le Tausaga o le Ola Faapaiaina (Consecrated Life) Vatican Jan 20, 2015.

O le vaitausaga o le Atevetu o se faigamalaga o le faamoemoe, auā o le taimi lea tatou te tapena ma sauniuni ai mo le afio mai o le Mesia. O se taimi taupoina e le Ekalesia tatou te tapena ai e faafeiloa'i le soifua mai o Iesu avea ma tagata. O le afio muamua mai o le Alii lea tatou te fa'amamaluina i le Kerisimasi. E lē gata i lea o se taimi taūa e tomanatu ma faatalitali ma le mataala i lona afio faalua mai i le aso gataaga. O lona uiga o le vaitau lenei o le vaitau o le sauniuni ma le tapenapena. Tatou te faatalitali ma le toto'a, mataala ina ne'i afio mai le Alii a o tatou lava sauni e faafeiloai iā te ia.

O le Atevetu foi o se laolao taūa i le Ekalesia e toe tomanatu ai i futia ua sola. O le tomanatuga i taimi ua fano o se auala lelei ma le mautinoa e tapena ai le tagata i lana faigamalaga o fufou mo le lumanai.

I lo tatou toe tepa i futia ua alu ma talatalapipi ma toe faasoa i mea na tutupu ai o se auala lelei lea e vivii ai ma faafetai i le Atua mo ana meaalofa ae maise lana taitaitama ma lana puipuiga lē augagase a o tatou faimalaga. O i'ina tatou te iloa ma maofa ai i ana galuega mamana ma faapea ifo, sa folau le Atua ma tatou. Sa lotolotoi lava le Atua i taimi lelei ma taimi leaga. Sa faasoa i o tatou olioliga faapea foi o tatou tigā. O ia ua tatou manumalo ai ma folau ai i va'a o manū ae fulifao pea le va'a o mala. O le agaga faafetai lea e ūna'iga ai tatou e matuā fuli lava e olaina le taimi nei i le mea e gata ai lo tatou malosi ma tatou te faapea ane ai, e leai se mea e faigatā i le Alii. Faataitaiga lelei o le Toa Samoa i le ipu o le lalolagi; ina ua vaai tama o le Toa Samoa o loo au le atunuu ma latou, ina ua latou tepa mai ma iloa o Samoa atoa o loo savavali

TOMANATUGA FA'ALEAGAGA MO LE VAITAU O LE ATEVETU

faatasi e ui ina vavamamao ala ma nofoaga. O inā na faafouina ai lo latou malosi ma faamautinoa ai lo latou faamoemoe, ave uma loa i iai o latou ola pei ona tatou molimauina. Ae ui foi ina malolo sa lanoga lava le mafanafana ma le fiafia auā na tausoa faatasi ma Samoa ma lana tapuaina.

O lona uiga o le Atevetu o se laolao taūa tatou te toe tepa ai i taimi ua fano ma le agaga faafetai ina ia tatou olaina le taimi nei ma le matua finafinau ma le loto fiafia. Ona tatou agai lea i le lumanai ma le loto e tumu i le mautinoa ma le faamoemoe ola, aua *“e leai se mea e faigata i le Alii”* Lk 1: 37, o lo’o tatou malaga faatasi.

To look to the past with gratitude and re-tell our story is to praise God and to thank him for all his gifts. It is when we look back at our sacred history that we discover the presence and action of God in our lives. Such gratitude leads us to live in the present moment with passion and joy, knowing that God is with us on our journey. Looking back with gratitude and living the present with passion means we will be full of hope for the future, knowing by faith that “nothing will be impossible with God” Luke 1:37.

Nisi o Galuega taua o le Atevetu

Ō i le mauga o le Alii

I le faitauga muamua (Isaia 2: 1-5) o le Aso Sa muamua o le Atevetu ua tusi ai e Isaia le ata faatusa o le mauga o le fale o le Alii. O le ute po’o le auga o le fale o le Alii o le fale e o i ai nuu uma lava. O le mauga e faapotopoto ai e le Alii nuu uma. Peitai, ina ua soifua mai ma liutino tagata le alo o le Atua na faailoa ai e Iesu o ia lava o le mauga o le Alii e sili i le mauga o Ierusalem. O le valoaga a Isaia o se folafolaga mamana mai le Atua e ao ai iā i tatou ona tatou olaina le olaga o ni tagata faimalaga. Tatou faimalaga aga’i ia Iesu lo tatou mauga ma lo tatou maluapapa. O Iesu o le uiga ma le autu o le tala’aga.

2

Mataala ma sauniuni

O le Aposetolo o Paulo ma Iesu i le faitauga lua ma le Evagelia o loo tauanauina ai tatou ina ia tatou mataala e faafeiloai Iesu i lona afio mai. O le faatusa o le mataala e le o le pupula lea o tatou mata i taimi uma e aunoa ma se moei’ini ae o le mataala faaleagaga. O lona uiga o le saoloto o le agaga/fatu o le tagata e fai le mea tonu ma le mea moni. Mulimuli i ala o le Alii ma sauni e ofoina atu lau tautua ma lau auaunaga mo le lelei o tagata uma ae maise lava le o mo’omia le fesoasoani. O le moe e ao ona tatou faatoilaloina o le moe o le fia’ese, manatu faapito, faamaualuga, faasausili, tuinanau, lē mafai ona ola i se sootaga lelei ma isi uso a tagata, leai se loto fesoasoani i uso ma tuafafine pagatia ma tuulafoaina, ma isi lava o tu ma aga e lepetia ai le valelei ma le Atua ma uso a tagata. O mea nei e auaoa ma fa’anenefu ai lau tapenaga i le afio mai o le Alii. Tatou sosoese ma nei ituaiga o moe ae tatou mataala i le alofa.

Mataala i e Moomia le Fesoasoani

Mataala e aofia ai lo tatou silasila toto’a ma sauniuni e tali atu i faafitauli ma manaoga o tatou tuaoi faapea uso ma tuafafine puapuagatia. Ia vave ona tatou tali ma ofo atu le fesoasoani ae lē faatalitali sei lona e fai mai. Atonu e lē faigofie ona faatino ae talitonu e leai se mea e faigata i le Alii.

Taua luga se manatu tatou sulufai i lo tatou Tina Taupou Paia Maria i lana puipuiga ma lana taitaiga faatina e sao ma uli ai le tatou folauga o le Atevetu. Ia avea le fautua tatalo ma le fesoasoani a Maria le Tina Mataala, Tina Taupou, le Tina o le Faamoemoe e taula’i ai la tatou vaai i le mauga o le Alii, o Keriso le na valaauina nuu uma ia te ia. **Le Alii e, matou te ifo ma faafetai atu ia te oe: Aua o lou koluse paia na e faaolaina ai le lalolagi. Amene!**

Fr Taisali Leuluai

AFIOGA KATINALE JOHN DEW



24 Novema 2022

Mo masina e tele ua tuana'i atu e faitau afe tagata sa 'au ai i le "talanoaga fa'aleagaga" a se vaega o le tapenaga mo le Sinoti: Mo se Ekalesia e Fegalegalea'i, **mafuta, auai, tala'i**". E momoli atu la'u fa'afetai iā i latou uma sa 'au ai, o outou leo ua lagonaina, ma ou te fa'amanatu atu ia outou o le taimi o le fa'alogo ma le iloiloa e le'i mae'a. Ua tatou fa'aauau le talanoaga o se vaega o tapenaga mo la tatou sao i le Sinoti a le Vaega Fa'akoniteneta.

I le taimi nei, sa tatou potopoto mo "talanoaga fa'aleagaga" i vaega 'ese'ese o a tatou fa'apotopotoga, palisi, a'oga ma le tele o mafutaga a le Ekalesia. Mae'a la tatou Aso o le Sinoti Fa'apule'aga (i le falesa a le Tama'ita'i o Kapiti i

le aso 28 Me), ma o a tatou talanoaga sa fa'amaopopoina o se tu'ufa'atasiga fa'apule'aga ma fa'atalanoa ai ma isi pule'aga e lima i le Aso o le Sinoti fa'aleatunu'u i le Kolisi a Saint Catherine i le aso 2 Iulai. O le tu'ufa'atasia o Niu Sila na avea o se tu'ufa'atasia o le 112 o Koneferenisi a Epikopo sa faitauina e se vaega fa'avaomalō sa fa'aalu le lua o vaiaso i le "talanoaga fa'aleagaga" a o latou tapena le Tusitusiga mo le Tulaga Fa'akonitineta "**la fa'alautele le mea e tu ai lou fale 'ie**" (Isaia 54: 2), ma o fa'apotopotoga i totonu o le Pule'aga sa tomanatu ai i leni tusitusiga.

Ou te mana'o ina ia outou iloaina o a outou leo ua lagonaina. I le faitau atu i tusitusiga mai isi atunu'u mai le lalolagi ua manino mai ai o le Fegalegalea'i ua lē toe va'aia na o se manatu. Ua tofo tagata i le talanoaga fa'aleagaga ma ua manana'o e fa'aauau ia faia fa'apea. O le masani i le fa'alogo o le tasi i le isi, amata mai i le fa'alogo i le upu a le Atua, ua fa'ate'ia ai i le tele o tagata le manatu ma le fa'anaunauga e a'afia ai i le olaga o le Ekalesia.

E to'atele fa'apotopotoga ua malamalama o le Fegalegalea'i o se vala'aulia e

fa'alogo iā i latou e manatu e lē o fa'aulufaleina i latou iā tatou fa'apotopotoga Ekalesia, ma ua latou talosagaina i tatou ina ia avea ma Ekalesia mo le 'au manunu'a ma le au lē amana'iaina, e lē o se fa'apotopotoga mo le 'au tulelei atoatoa. E to'atele ua fa'amafafa maia o le ulua'i taimi leni ua tapā ai e le Ekalesia sa latou manatu ma ua latou mo'omo'o ina ia fa'aauau ai pea leni faigamalaga.

O le fe'au a le Sinoti e fa'atauva'a lava. Ua tatou a'oa'o pe fa'apefea ona tatou savavali fa'atasi ma fa'atasi atu ma isi e tofitofi le Falaoa e tasi, ina ia maua e tagata uma lo latou nofoaga. Ua vala'auina tagata ta'ito'atasi e 'au ai i leni faigamalaga, e leai se tasi e lē o a'afia ai. Ua vala'auina i tatou ina ia faia leni ina ia talitonuina lo tatou folafolaina ole evagelia a Iesu i tagata uma.

Fa'afetai atu iā outou mo au-ala sa outou 'au ai ma fa'amolemole fa'aauau ona tatalo ma sa'ili nisi auala i palisi, a'oga ma isi fa'apotopotoga e fa'avae i le Ekalesia ina ia au ai i le "talanoaga fa'aleagaga."

Ma fa'amanuia uma lava
+ loane

FAAFETAI, FAAFETAI TELE LAVA!

O le a tafa'imaā ia le tamaloa na liufatu i le Alataua, oute lē taina foi i tua le tili pe asaina le vao filifili o outou paia sausaugata aua o paia ia ma mamalu faataotooto e taoto ā a ose ala o'o. Ua uma ona tosi lauti ma mamanu faatiti i le tofā ma le utaga loloto e pei o faiva o le Aiga Salemalama;

na fuafua, faufau, nafa'afafa ma ua malamalama. O paia ua tu'ulaupua ma paepae faati'a i ulupaga, i le afua mai i uluga tafega, le papa le gae'e o tupu ma tamalii faapea foi le falaseese o faleupolu o tofiga e ona le fatuaiga tausisi. Tulouna ia la paia o Samoa ae oute fia faaaogaina leni

FAAFETAI, FAAFETAI TELE LAVA!

Laolao ma lenei auaunaga e fa'ailo ai lo'u nei agaga faafetai i le tatou Kapelanisia Samoa i le Puleaga Ueligitone Niu Sila. Tulouna le malu taue'e o lupesina o le talalelei le aiga Salevī, le afifio paia o ositaulaga. Tulouna le faavailolo o le afaigaluega tofofi a le Atua, le susu i susuga i Fesoasoani ma o latou Faletua o feoi, mū ma lamepa ia o le talalelei. Tulouna le au nofo voto, tamaitā'isa o auga faapae o le talalelei. Tulouna le susu i lau afioga i le taitai fono ma lou auvaa togia. Tulouna le susu i le taitai sooupu o le Kapelenisia le afioga i le Sa'ofetalai. Tulouna le paia maualuga i taitai fono ma laulau o aulotu taitasi faapea faauluuluga o faalapopotoga o le Kapelanisia. Faatulou foi i le paia maualuga le afifio o Tapaau ma Aiga, le papa le gae'e o tupu ma tamalii faapea tafa'itoa o faleupolu tofia aua le fue ma le tootoo, o le fetalaiga e malu ai. E Faatulou foi i le afifio o le paia i Faletua ma tausi, sa'oao, le malosi o le Kapelanisia ma le lumana'i lalovaoa. Oute faatulou foi i le tapuaiga mamana a aosinasina, le fala seese e o matua tausi ma ulutaia o loo ūla le mulila ma tu'i le mulipapaga, nono manū mo le Kapelenisia ma le Ekalesia. Ua faamalo faafetai le soifua i le folauga o le faatuatua, malo le galulue punoua'i, malo le faatautai i faivaalofilima o faigataulaga o le faatuatua. Ia viia le Atua i galuega lelei na faatinoga o le faatuatua.

Ae oute momoli atu le agaga faafetai mai le taele o lo'u fatu i la tatou mafutaga i masina e fia na tatou mafuta ma galulue ai. E ui ina puupuu ae ua maofa le alofa mafanafana molimauina.

Faafetai tele le tama o le puleaga le Afioga ia Katinale loane Dew i le faatagaina o lo'u nei tagata e faatino ou tiute faaositaulaga i la outou puleaga. **(Much appreciation and sincere thanks to his Eminence Cardinal John Dew for authorising me the faculty to celebrate the Eucharist in your Diocese. I'm truly grateful.)**

E alagaina foi le uiō o le faafetai i o'u uso ositaulaga ona o lenei avanoa le aumaua na outou tatala oute faatino ai se auaunaga le atoatoā i le Kapelanisia. Faafetai tele le fai uso malo le alofa.

E lē ta'ialalo foi le agaga faamalo ma le agaga faafetai i susuga i Fesoasoani ma Faletua o uso i le galuega tulou tou paia ma mamalu faale-Ekalesia. Faafetai lo tou faaloalo ma le agalelei i lo'u nei tagata e ui ina mu'a i le galuega.

Momoli foi le agaga faafetai i lau susuga le taitai (Lay Pastoral Leader) Afioga Sala i le valaauina o lo'u nei faatauavaa mo se fesoasoani aua taulaga paia o Misasa a le Kapelanisia. Faafetai mo le faatuatuaga na e aumai i lenei auauna faatauavaa. Malo le faato'ato'a malo le tautai matapalapala, malo le alofa i le Kapelanisia.

E manuoina foi le agaga faafetai i le susuga i le taitaifono mo lou auvaa. O outou o foe mua aua le solo lelei o polokalame faata'atitia a le Kapelanisia. Malo le tofa ma le faau'utaga, malo le tautua. Faafetai foi le talileleia o lou faatauavaa i la outou galuega o le faatuatua.


Oute sula ina foi le alofa matalasi ma le agalelei o le paia ma le mamalu o le Kapelanisia mai i ona itutino taualoa se ia paia se faatauavaa. Mai afu loloto ma mauga maualuluga se ia paia magāvaiiti ma mulivaito'a. O ao sinasina ma matua tausi se ia oo lava i fanau iti. Ua lē ōle la outou faaloalo ma lo outou alofa. Faafetai tele e le gata ina tatala faitoto'a o a outou malumalu, a'o faitoto'a o outou maota ma laoa. O le tausiga foi i la le tino ma meaalofo o seleni paia ua lē maseuga lea. Aisea? O ai lo'u faatauavaa ua outou manatu mai ai. Ā, o le upu a le atunuu e le tauilo tapuvae o tama folau, e le tauilo foi le tamalii i ana aga. Ua e masani lava oe i au teuga faatamalii. Faafetai, faafetai, faafetai tele i le Kapelanisia o la outou pule lea. Ua se taliga e fia faalogo le mauga i Salafai aua o au faaloaloga ua malie mata e vaai ua malie foi taliga e faalogo. Ua malie le faga i Paūa ua malie foi le faga i Taū ua malie le papa i Galagala malie le papa o le faatolotologatama ua malie faalaeo ua malie faasāō ua malie ō ua malie malo. Paga lea ua gā o se faafetai faatauavaa e le lilo le lanu lo outou alofa. Afai ua le palea ma le sooa lou titi ona ua le a'ua'u ise faafetai faatauavaa a lenei auauna, oute tatalo ia faau e le Atua e ona kalasia. O ia o loo iai le sosia o faamanuiaga na te tau i lo outou ola faitaulaga. Alofa ma toe faatumu la outou tuugaoa ua gaogao ona o lenei auauna faatauavaa. Faafetai, faafetai tele.

Peitai, e lē āsa se faiva ma se maumau, e āsa foi faiva ae lē āsa le masalo oute ioe ma iloa lo'u le atoatoa. Faamalulu atu ona o le lē atoatoa o sau auaunaga ma se faatinoga i lau silasila aua e se lava le atu i ama. Tatalo ia faa'atoa ma faamanaina e le Atua e ona le galuega. Afai foi na iai se lē migao poo se aga le tau-tamalii i lau faafofoga, faamoemoe i lou titi faitama e magalo ai le auauna. O i'ina matou te malu ai.

O lau tatalo, agalelei le Atua ma faamanuia le tatou Kapelanisia. Foa'i le soifua lagilelei i luga ia te outou. Sasa'a faauaga ifo ana kalasia ma lana faaloaloga faaleagaga faapea le faaloaloga faaletino. Ia maua lo tou soifua maloloina i le tino ma le agaga. Sau se taimi tu'ua le mafutaga tatou taumavae i le mavaega nai le Faleopunaoa, O manū tatou te mavae ai o manū foi tatou te toe feiloai ai. Faamanuia tele le Atua i le Kapelanisia. Tofa ma ia manuia.— O la outou auauna, **Patele Taisali Leuluai.**

SAGATO IOANE

Aposetolo ma le Tusi Evagelia



O le Atua lava na vala’au, a o tagata na tali. O le tofiga a Ioane ma lona uso o Iakopo o lo’o fa’amatalaina i Evagelia, fa’atasi ai ma Peteru ma lona uso o Anitele’a: na vala’auina i latou e Iesu; ma latou mulimuli atu i ai. O le atoaga o la la’ua tali o lo’o fa’ailoa mai e le tala. O Iakopo ma Ioane ‘o lo’o i le va’a ma lo la tamā o Sepetaio ua latou fai masae a latou upega; ua ia vala’auina atu fo’i iā te i la’ua. Ona la tu’ua loa lea o la’ua upega, ae mulimuli atu iā te ia’ (Mataio 5: 21b – 22).

Mo nei tagata fai faiva e to’atolu – Peteru, Iakopo ma Ioane – o la latou fa’atuatua ua tauia e se fa’auō fa’apitoa ma Iesu. Ua na o latou na fa’aeaeaina i le i ai i le taimi o le Liua o Iesu, le toe fa’atuina o le afafine a Iario ma le tigāina i Ketesemane. Ae o le fa’auō a Ioane ua sili atu lona fa’apitoa. O tu masani ua fa’atulagaina iā ia le Evagelia lona Fa, e ui o le to’atele o le au atamamai i Tusitusiga Pa’ia i aso nei ua manatu o le aposetolo ma le tusi evagelia o le tagata lava e tasi.

O le Evagelia lava a Ioane o lo’o fa’asino iā te ia ‘o le so’o ua alofaina’ (va’ai Ioane 13: 23; 19: 26; 20:2), o le tasi na fa’alagolaga atu iā Iesu i le

Tausama’aga Mulimuli, ma le tasi na ia tu’uina atu i ai le fa’aeaea matagofie, a o tutū i lalo ifo o le koluse, i le va’ai atu o lona tinā. ‘Sena e fa’auta o lau tama...fa’auta o lou tinā!’ (Ioane 19: 26b, 27b).

Ona o le loloto o lana Evagelia, e masani ona mafaufauina Ioane o le aeto o le telosia, ua alu atu i vaega mauululuga e lē ulu atu i ai isi au tusitusi. Ae o isi Evagelia fa’amaoni pea ua fa’aalia nisi o uiga moni fa’aletagata. Na avatu e Iesu ia Iakopo ma Ioane ni igoa vala’au, ‘atali’i a le faititili’. E ui e faigatā ona iloaina lelei le uiga o lenei fa’aupuga, o se tali o lo’o aumai i ni mea se lua na tupu.

Muamua, e pei ona fa’amatala e Mataio, o latou (fai mai Mareko o lo latou tinā) na fesili pe nonofo i nofoaga o le mamalu – le tasi i lona itu taumatau, le isi i lona agavale. Ina ua fesiligia i la’ua e Iesu pe mafai ona la’ua inuina le ipu o le a ia inuina ma papatisoina i lana papatisoga o le tigā ma puapuagā, sa la’ua tali mai. “Ma te mafaia!” Na fai atu Iesu o le a la’ua fa’asoa i lana ipu, ae o le nofo ai i lona itu taumatau e lē o ia e āna e avatua. O ni mea ua saunia mo i latou ua tapenaina e le Tamā. O isi so’o ua lē fiafia i le fa’anaunauta’iga sesē a nei ‘auso, ma na fa’aoga e Iesu le avanoa e a’oa’o atu ai iā i latou le natura moni o le pule: o sē fia muamua fo’i iā te outou, ia fai o ia ma a outou tautua. E pei o le atali’i o le tagata e le’i sau ia ina ia ‘au’auna mai tagata iā te ia, a ia ‘au’auna atu ia ma foa’iina atu lona ola e fai ma Togiola e sui a’i tagata e to’atele” (Mataio 20: 27 – 28).

I le isi taimi ‘atali’i o faititili’ ua fesili atu iā Iesu pe le tatau

ona vala’auina mai le afi mai le lagi i luga o Samaria lē fa’aaloalo, latou ua le fa’aulufale mai Iesu ona o lo’o aga’i atu i Ierusalem. Ae “faliu o ia, ma a’oa’i iā te i la’ua” (va’ai Luka 9: 51 – 55).

I le ulua’i Eseta, o Matalena ua “momo’e lea o ia iā Simona Peteru ma le tasi so’o sa alofaina e Iesu, ua fai atu iā te i la’ua, “Ua latou ave’eseina le Ali’i i le tu’ugamau; matou te lē iloaina fo’i le mea ua latou tu’uina ai o ia” (Ioane 20: 2). Na manatua e Ioane, atonu ma se foliga fiafia, o ia ma Peteru na mua’i o’o i le tu’ugamau (Ioane: 4b). E le’i ulu atu i ai, ae o Peteru na tu’uina atu iā ia e muamua i totonu. “ona ulu atu lea o le tasi so’o na mua’i o’o i le tu’ugamau, ua va’ai atu, ona talitonu lea o ia” (Ioane 20: 8)

Sa fa’atasi Ioane ma Peteru ma le ulua’i vavega tele ua taunu’u i le uma ai o le Toetū – le fa’amaloloina ole ali’i na fanau mai e pipili – na o’o ai i la’ua i le fa’aalu o le po i le fale pui-pui. O le iloaina fa’amisitelio o le Toetū atonu o lo’o maua lelei i upu a le Galuega: “Ua va’ai i latou i le loto tele o Peteru ma Ioane, ma ua iloa o tagata e le’i a’oa’oina i la’ua ma le valelea, ua latou ofo ai; ua latou iloa fo’i o i la’ua sa latou fa’atasi ma Iesu” (Galuega 4: 13).

Na tusia e le tusi Evagelia le Evagelia tele, o tusitusiga ma Tusi o le Fa’aaliga. O lana Evagelia o se fa’amatalaga a ia lava. Sa va’ai i le mamalu ma le mamana a Iesu i mea na tutupu i iloiloga tau amioga a lona olaga. I le Tausama’aga Mulimuli, o Iesu a Ioane ua Tautala e pei ua i le lagi. O le Evagelia o le mamalu o Iesu.

Maria Imakulata –

(Sulufaga Ma'itaga Lē Ponā aso 8 Tesema)

O Maria o le fa'ata'ita'iga maoa'e o se tagata o le Atevetu. I se taimi o le tala'aga a le fa'aolataga, na fai atu le Atua iā te ia, o le a avea o ia ma tinā a lona Alo. O se vala'aulia fa'amana'oga ma se mea na ātugalū tele ai o ia. Ina ua avatu lana tali i le agelū o Kapeliele, 'ia faia iā te a'u e pei ona e fetalai mai ai,' ua amata le galuega o le fa'aolataga ma mai lona tagata na sau ai le tino ma le toto. Ina ia talafeagai mo lenā fa'aeaea, na fa'akalasiaina o ia e le Atua i le sa'olotoga mai le ulua'i agasala mai le taimi o lana ma'i taga. O Maria na avea ma Imakulata, e le'i pa'i i ai le agasala mai le taimi o lona fanau mai. O le tinā o lo'o tau'ave le Alo o le Atua, e lē mo ia lava ae mo se lalolagi o lo'o i ai le mana'omia, e leai se sao, se gaioiga po o se vaega i le agasala. O Maria na avea ma ulua'i so'o a Keriso ma o se fa'ata'ita'iga o le uiga o le fa'aso'o'ina.

O le sulufaga ua patipatia ai le loto maualalo ma le fa'atuatua a se fafine o lē ua talia le lu'itua tu'uina atu e le Atua iā te ia. O ia o se fa'ata'ita'iga o mea e mafai e olaga o tagata ona ausia pe pa'i atu i ai le Atua. E pei o le tele o tinā sa ia tu'uina mai se tama itiiti ile lalolagi ma le lē malamalama a'ia'i i fuafuaga a le Atua. E lē tatau ona tatou mafauina ona o Maria sa leai se agasala, sa leai fo'i ma ni tauviga fa'aleolaga nei. O ia fo'i sa feagai atu ma masalosaloga ma faigatā ua feagai ma i tatou. E pei o lona Alo, sa ia fa'asoa i o tatou fa'afitauli uma ma

faigatā ua fa'ailoa mai ai iā i tatou le taūa o le onosa'i i ogatotonu o a tatou fa'amasinoga, i le liliu o a tatou fa'anoanoaga ma fa'afitauli i le fa'amoemoe ma le olioli.

Ua fa'amanatu mai e Maria ia i tatou le agalelei o le Atua o le punavai ma a'a o tatou olaga. O le mea sa ia mana'o ai mo Maria ua mana'o ai fo'i mo tatou. I le auina mai o lona Alo i le lalolagi, na mana'o le Atua e fa'asoa le lelei atoatoa o ia lava ma i tatou, i le faia o tatou ma ona atali'i ma afafine fai. Ua vala'auina i tatou ta'ito'atasi e pei o Maria e fa'aulufale mai Iesu ma faia ni avanoa mo ia i o tatou olaga. A tatou avatu i ai le lagolagosua i le ola ai o lana upu ma fa'asoa i lona koluse, o le a ia fa'atonutonu i tatou o ni nofoaga talafeagai mo lona Alo. Ua a'oa'o mai e Maria ia i tatou le uiga o le tu'u atu atoa o i tatou i le finagalo o le Atua ma lana pule. Ua fa'amanuiaina i tatou i le vala'auina o Maria o lo tatou tinā ma avea o ia ma fa'ata'ita'iga e fa'aa'oa'o i ai le tele o tatou lelei. O mea ola uma lava, o ia ua sili atu le latalata i le alofa o le Atua, i lona loto ma mea uma lava e tatau ona avea ma tagata. O lona Ma'i Taga Lē Ponā Imakulata ua vala'uina ai i tatou ina ia avea i tatou ma sa'olotoga tele ma avea i tatou ma atoaga e pei o fuafuaga e fa'avavau a le Atua.

Ia tatou vivi'i i le Atua mo le meaalofa o le Ma'itaga Lē Ponā Imakulata a le Taupou Pa'ia o Maria

Fa'amanatuina o le Papatisoga o le Ali'i (Ianuari aso 8)

O se taimi mamalu i le tala'aga o le fa'aolataga ua fa'amaumauina fa'atasi ma se va'aiga maoa'e o Keriso o 'au atu i laina fa'asolo a le anoanoa'i o tagata agasala ua lolofi atu i le auvai a Ioritana ina ia papatisoina e Ioane. Ua taunu'u le taimi e tu'ua ai lona olaga tuma'oti i Nasareta ma amata lana galuega laua'itele. Sa le mautonu Ioane i le aga'i atu o lenei tagata e leai se agasala ae ina ua manua'e Iesu mai le vai, na sulugia le lagi i le mamalu a o latou fa'alogoia le leo a le Atua le Tamā, "O lo'u Atali'i i pele lenā, ua ou fiafia lava iā te ia" (Mataio 3: 7). O le papatisoga o Keriso e lē gata o se fa'amatalaga o le fa'amaoniga o ia i se auala fa'apitoa ae fa'apea lona naunauta'iga e ta'u

atu i le lalolagi atoa o lona mana'oga mo le fa'aolataga. I le taliaina o le Papatisoga, ua tu'uina atu o ia lava i le galuega o le ave'esea o agasala a le lalolagi.

O lenei sulufaga o se fa'amanatu malosī mo tofiga ua vala'auina ai i tatou. Ua toe manatua ai o tatou papatisoga i le vai ua uma ona fa'apa'iaina ua fa'amamāina ai o tatou agaga mai le agasala ma le amataga o la tatou mafutaga ma le Atua. O fatu o le olaga Kerisiano o lo'o totōina i le papatisoga ma o lona uiga ua avea i tatou ma aiga o le Atua, ma mafai ai ona tatou vala'auina le Atua 'Tamā' ma Iesu Keriso, o tatou 'Uso/Tuagane'. E pei o Keriso ua filifilia i tatou mo le tala'iga i lenei

Fa'amanatuina o le Papatisoga o le Ali'i (Ianuari aso 8)

lalolagi i o tatou taimi. O le fa'atinoina o lenā tala'iga o le a mafai ona fa'ataunu'uina pe a tatou sauniuni e pei o le finagalo o le Atua. O le mea moni lava, e lē uma ai le papatisoga pe a mae'a ona liligi e le ositaulaga le vai i luga o tatou ulu ma manatu ua mae'a ai le sauniga pa'ia. O le sakalameta o le totōina o le fatu o le olaga Kerisiano e tupu ma fua mai ai fua a o tatou atiina'e la tatou mafutaga ma le Atua.

O le amataga o le tausaga fou ua tatou maua ai se avanoa e toe fa'afou ai la tatou tautinoga iā Keriso ma atagia mai ai la tatou vala'auina o ni suli o le aiga a le Atua. O la tatou matafaioi fa'apitoa o le fa'aailoa atu lea o Iesu i le lalolagi. E tele auala 'ese'ese e faia ai. Ua vala'auina i tatou uma e moli-mauina iā Keriso i o tatou lava li'o o le olaga ma faia le lalolagi o se nofoaga mo tatou lava. O le sela ua fa'amumūina i le fa'ai'uga o le papatisoga o lona uiga tatou te fa'aailoa atu Keriso i upu ma gaiogiga i so'o se mea tatou te o atu i ai. Pe tatou te mafau fauina lenei folafolaga pe a lu'itauina i tatou ina ia fa'amaoni pe solomuli mai le fa'aleagaina o tatou tuā'oi? Tatou te tomanatu i le mamalu o le Atua pe a tatou mumusu e fetu'utu'una'i ma le tiapolo i so'o se ituaiga o tulaga? I lenei faiga ua tatou faia Keriso e talitonuina i auala faigofie lava.

O le aso 1st. Ianuari –

FA'AMAMALU AI MARIA LE TINĀ O LE ATUA

Ina ua iva-sefulu-ma le iva tausaga o Aperā'amo le pateliaka, na fa'aali le Atua iā te ia ma fa'aailoa atu i ai o lea fa'amausalī ma ia ma ana fanau se feagaiga. O se fa'aailoga o lenei feagaiga o tama tane uma e fananau mai iā Aperā'amo o le a peritomeina pe a atoa le valu o aso o le matua. O le mafua'aga lenei ua avea ai le peritomeina ma se fa'aailoga o le feagaiga a Aperā'amo ma tagata Iutaia ma le Atua. Ua i ai fo'i ma le peritomeina o Iutaia se sauniga mamalu ma le pa'ia. E toasefulu ni suli o le aiga po o ni fa'auō e vala'auina ina ia molimauina. A lē o le tamā o le tamaitiiti po o sē e fa'atinoa lea sauniga e suia le tamā. O le peritomeina o Sagato Ioane le Papatiso na mafai ai e Sakaria ona toe tautala. I lenei taimi sa tautala ai i ni upu matagofie i le vivi'i, 'Ia vivi'i atu lo'u loto i le Ali'i'.

Po o fea ma pe fa'apefea fo'i ona fa'ataunu'uina le peritomeina o Iesu e lē o ta'u maia e le Tusi Pa'ia iā i tatou. Atonu sa fa'ataunu'uina i Pe-tele'ema ma o Sagato Iosefo lava sa faia, ae tatou te lē o mautinoaina.

Peritomeina e mafai ona va'aia o se sitepu muamua o galuega tetele a Keriso i le fa'aolataga o le tagata. I le fa'atinoina o le peritomeina o le ulua'i sinasina o le toto mamana a lo tatou Fa'ao-la ua fa'amasa'a. O le ulua'i faigataulaga ua ia faia mo tatou. O le soifuaga atoa a Keriso o se

olaga o le faitaulaga, ae o lenei olaga faitaulaga na amata i lona peritomeina. O le mea lea o le peritomeina o Keriso e mafai ona fa'aigoaina o le amataga o la tatou fa'aolataga. O le mea lea ua talafeagai ma tonu tatou te amataina la tatou tausaga fou fa'akalena i le aso na amata ai le Togiola o tatou e Keriso.

O le isi vaega o le sauniga o le peritomeina o le fa'ae'eina lea o se igoa i le tama itiiti fa'atoa fanau mai. Ua ta'u maia e le Evagelia o le asō o le igoa "Iesu" na avatu i le pepe fou le Tama itiiti Keriso. O le igoa lenei na fa'atonuina e le agelu i le Fa'aaliga ia Maria. Na fai atu Kapeliele ia Maria o le a ia fanau mai se tama itiiti ma e fa'aigoaina iā "Iesu".

I taimi anamua o se igoa e sili atu lona uiga i lo nei aso, o igoa ta'itasi e masani ona i ai se uiga fa'apitoa. O se igoa e masani ona fa'aalia mai ai le natura o se tagata. O le igoa "Iesu" o lona uiga "Fa'aola." I lona tala fa'asolopito pa'ia sa i ai se tasi o ali'i sa i ai lenei igoa. O Iosua, o le uiga o lona igoa "Fa'aola" o le igoa e pei o Iesu. O Iosua o se fa'aola mo ona tagata ona sa ia ta'ita'ia maia i latou aga'i atu i le nu'u na folafolaina.

Ae o Keriso o se ituaiga o fa'aola e 'ese. E lē mo ia e toe fa'afoua le malō fa'alalo nei a Tavita pe fa'asa'olotoina fo'i tagata Iutaia mai saisaiga a

O le aso 1st. Ianuari –

FA'AMAMALU AI MARIA LE TINĀ O LE ATUA

tagata 'ese. O lona mafua'aga o le lavea'ina lea o ona tagata mai a latou agasala.

O le peritomeina atonu e fa'atusatusa atu i le papatisoga. Ona o le peritomeina o le Feagaiga Tuai, papatisoga o le Feagaiga Fou. A o tu'uina atu se tama itiiti Iutaia mo le peritomeina i le valu o aso talu ona fanau mai, o tama itiiti Kerisiano ua tu'uina atu mo le papatisoga i le uma ai o lona fanau mai. A o tu'uina atu se igoa e i ai lona uiga i le tama itiiti i le Feagaiga Tuai, o le igoa a se tagata pa'ia ua tu'uina atu i le tama itiiti i le papatisoga.

O a tatou papatisoga ua sili atu i lo le peritomeina, ona o le papatisoga o se sakalameta, a o le peritomeina e leai lea. O le papatisoga ua fa'ae'e atu ai le kalasia pa'ia i le agaga o le pepe o lo'o taliaina. O le papatisoga o le fa'aatoaga ma le fa'ataunu'uina o lenei sauniga; peritomeina o lo-

na amataga ma le fa'amuamuaina.

I lenei aso muamua o le kalena mo le tausaga fou, ua tatau ma talafeagai ai ona tatou fa'amamaluina Maria ma lana tama pepe. O le aso muamua o le kalena fa'aletausaga ua fa'amanatu ai le aso na amata ai e Keriso la tatou fa'olataga – le aso sa ia fa'amaligi ai lona ulua'i toto mo tatou. Ia avea le faigataulaga a Keriso e telē sona uiga mo i tatou.

I le faia o ni fuafuaga mo le Tausaga Fou, ia fa'ailoa atu o tatou talisapaia o faiga taulaga a Keriso. Ia fa'apea ona tatou faia ni faigataulaga. Ia tu'uina atu o tatou lava i le vai o kalasia ua ofoina mai e Keriso iā i tatou. Ia tatou manatua o lana faigataulaga lenei mo tatou e lē fa'apea e leai sona aogā. Fa'amanuia le Atua ia outou uma lava.

KILISIMASI

8

O se tala aupito sili le matagofie ua fa'amatalaina o le tala i le fanau mai o Keriso. O se tala mamana na fa'aosofiaina e le Atua lava ia. I lona va'aiga pito sili le matagofie o lo'o fa'amaumuina ile Evagelia a Sagao Luka, o lē na fa'alogoina mai laugutu a lo tatou Tinā Pa'ia, i le tele o tausaga i le mae'a ole maliu a le Fa'aola. O se tala ua na o Maria e mafai ona fa'amatalaina i lona anoanoa'i o le alofa – o se tala sa teuteuina e Maria i lona loto, ae na fa'atonuina e le Atua o ia e fa'amatala ia Sagato Luka, ina ia fa'amaumuina ma fa'aaliaina ile lalolagi.

A o avea Quirinius ma kovana o Suria, o se fa'atonuga ua lolomiina e Kaisara Aukusitino fa'atonuina ai se tusigā igoa a le lalolagi atoa. O tagata uma na agai atu e resitara i le taulaga na fanau mai ai o ia. I le tusita'iala o le fa'atonuga a Kaisara na mal-

aga atu ai Iosefo ma Maria, o lana avā, mai le latou aiga i Nasaraeta ma aga'i atu i Petele'ema, le 'a'ai o Tavita, pe ma se onosefulu maila le mamao. O le malaga sa faigatā. Pe tolu i le fa aso na savavali ai Maria ma Iosefo ma ti'eti'e i le asini ina ia taunu'u.

O Petele'ema inā aso o se 'a'ai e la'itiiti i lalo o le mauga o Iutaia. I lona itu i sasa'e e ta'oto ai le toafa a Iutaia. O se nofoaga e masani ona malolō i ai tagata faimalaga atu i le toafa. I le tulimanu o le 'a'ai e i ai se fale talimalo tele. O le fale tali malo i Petele'ema o se vaega e fa'atafafa e si'osi'omia e ni papuipui tetele. E tasi le faitoto'a e ulufale atu ai. O manu e tu'u i fafo i le po i le malae. O latou e āna nei manu ua momoe i luga o tulaga ua si'osi'omia ai le malae.

E lē masalomia sa sa'ili Iosefo mo se potu mo Maria ma ia i nei

vaega, mo Maria o lo'o tauave le pepe ma o le taimi e fanau mai ai ua lata. Ae na fa'ailoa atu ia Iosefo ona o le to'atele o tagata malaga o lo'o malolo ai i lea nofoaga ua tumu le fale. Pau le nofoaga o lo'o avanoa o le momoe i le fale o manu fa'atasi ma manu. O le fa'apaologa lenei na fa'amalosia Iosefo e malolo i ai.

O le fale manu lenei na fanau mai ai e Maria lona alo le ulua'i fanau mai. Sa ia ta'ai iā te ia i 'ie ma fa'ata'oto o ia i le mea e fafaga ai manu. O le Fa'aola a le lalolagi ua fanau mai i Petele'ema. O le anoanoa'i o agelu ua fa'apepepe fa'atamilo i le fale manu ma a latou pesega ua fa'atumulia ai le 'ea i musika fa'alelagi, "Vi'ia le Atua i mea aupito aluga, ma le filemū iā i latou i le lalolagi ua alofagia e ia."

Ua aumai e agelu le tala lelei o le fanau mai a lo tataou Fa'aola i

KILISIMASI

leoleo mamoe i lenā nofoaga, ola ai i le vao ma leoleo iā latou lafu i le po. Na fa'aali le agelu a le Atua iā i latou a o susulu atu le mamalu a le Ali'i ia i latou. Na fai atu le agelu iā i latou, "Aua tou te matatau, auā fa'au-ta, ou te aumai ia te outou le tala lelei o le olioli tele e o'o mai i nu'u uma; auā o le aso nei ua fanau ai iā te outou i le 'a'ai a Tavita le Fa'aola, o ia o Keriso le Ali'i, le Mesia. O le fa'aailoga lenei iā te outou. E iloa e outou le tama meamea ua aui i le 'ie, o lo'o ta'oto ile fale o manu."

O le fanau mai o Keriso o sē e 'ese'ese lona uiga mo le tele o tagata 'ese'ese. Mo Maria ma Iosefo ma le au leoleo mamoe, o se taimi o le alofa. O le fale manu e leai ni mea o i ai ua fetau ma le mafanafana o la agalelei. O leoleo mamoe o ni tagata e masani i le olaga i fafo ma le malolosi. E masani ona fetau atu i luko ma tagata gāoi i le puipuia o a latou lafu. E fa'aalu le tele o itula i le onosa'i i le leoleoina o lafu i fa'ato'aga.

O leoleo mamoe e masani o na va'aia o ni tagata e lē i ai ni tamā o aiga; e toetoe lava ona leai ni fa'amoemoega ae e manumanu ia latou lafu ma ua feagai atu i le tele o fa'afitauli i le puipuia o a latou lafu. O le mea lea, o le alofa o se vaega o

a latou olaga. Ua tumu o latou loto i le alofa ma le olioli ina ua ta'ita'ia i latou e agelu e va'ai i le pepe o lo'o ta'oto i le fale manu.

Ae sa i ai ma isi e 'ese o latou lagona. O le Tupu o Herota i Ieruselema na fa'alogi i le fanau mai a lo tatou Fa'aola mai le au Makoi. Ae o lona loto ua tumu i le loto leaga ma le inoino. Sa ia va'aia le fanau mai o le pepe Fa'aola o sē e tauvā ma ia mo lona malō fa'alalo nei. O le iā na tuputupu a'e i lona loto ma na mana'o e fasioti le Tama itiiti o Keriso, na fasiotia ai uma tamaiti i le pelu e ta'i lua tausaga ma lalo ifo.

O tatou fo'i o le a mauaina i le fale o manu le mea o lo'o tatou sa'ilia. I o tatou loto ua tumu i upu fa'alalolagi nei pe afai ua fa'atumulia i tatou i mea fa'alalolagi nei, afai tatou te popole na o mea fa'aletino, o la tatou taga'i o le a fa'a'atū i le pogisā ma le mativa a le fale manu. Ae afai e tatala atu o tatou loto ma talia le alofa, ona fa'amafanafanaina lea o tatou loto e le tala o le alofa. O le a fa'aosofiaina i tatou e alofa atu i le Pepe Fa'aola o lē na sau i lenei lalolagi mo i tatou. O le a fa'aosofiaina i tatou e fa'aali atu le alofa i o tatou uso a tagata.

O se tala a o faia le taua i Amerika, sa o mai autau e lua ma a o agai atu o le a fetau ae fa'afuase'ia ona va'aia se tama itiiti pepe o totolo ifo i le auala i le mea o le a fetau ai nei autau e lua. Na sisi e nei autau e lua ni fua pa'epa'e mo le filemu ma na o atu e fesoasaoni i lenei tama itiiti. Mo lenā aso e tasi, muamua atu i le fa'amanatuina o le Kilisimasi o le 1863 o se tama itiiti ua ia aumaia le filemū i autau e lua sa fe'ese'esea'i.

O le Tama itiiti Keriso ua sau i le asō (kilisimasi), fanau i le fale manu, o le a ia aumaia le filemū. E tatau mo i tatou ona sauniuni o tatou loto e talia o ia. E tatau ia i tatou ona ave'ese atu le loto iā ma le mana'otele. E tatau ona tatou tu'u atu le alofa e nofoia lona nofoaga. Ona a tatou o mai e tu'u fa'atasia o tatou loto ma ia i le Komunio, o le alofa o le Tama itiiti o Keriso o le a fa'atumulia ai i tatou. O le alofa na susulu mai le fale manu o le a aumaia le olioli i le lalolagi.

Fa'amanuia le Atua i le tatou Kapelanisia i lenei Kilisimasi ma ia maua e outou uma se Kilisimasi filemū ma le fiafia.

ASO SA I LE UMA O LE KILISIMASI

(AIGA PA'IA)

I nai tausaga sa va'ava'ai Pope Leo XIII (13) mo se sagato e fa'aailoa e avea ma puipui o le Ekalesia Aoao. O olaga o le tele o tagata pa'ia sa su'esu'eina: o olaga o pope ta'uta'ua, o olaga o le au Aposetolo ma misionare. O puapuagā a le au maletile sa iloiloina; o tusitusiga a tamā a'oa'oina sa faitauina ma fa'atalanoaina. I le mae'a ai o

fa'atalanoaga sa fai, na filifilia e Pope Leo se sagato sa ta'ita'ia se olaga fa'atauva'a, se tasi e le'i faia se lauga – se tasi e le o se maletile – se tasi o lona olaga sa filemū ma e leai ni mea sa tutupu ai.

ASO SA I LE UMA O LE KILISIMASI

(AIGA PA'IA)

Sa ia filifilia Sagato Iosefo. O le mafua'aga sa ia aumaia o le Atua na filifilia Iosefo e avea ma fa'auluuluga o le Aiga Pa'ia. Mautinoa lava afai o le Keriso Tamaitiiti ua fa'atuatua lona olaga i lima o Sagato Iosefo i lenei lalolagi, e lē sesē Pope Leo i le tu'uina atu ma le fa'atuatua le Ekalesia i lana tausiga.

O Sagato Iosefo e lē o se ali'i mau'oa; sa le'i mafaia ona ia avatu iā Maria le 'oa ma le tamaitiiti o Iesu, ae e le'i mana'o Keriso i nei mea. Ina ua alu atu Iosefo i Petele'ema e resitara mo le tusigaigoa na poloa'ia e Kaisara, pau le mea na ia maua mo le faigamalologa mo Maria ma ia o le fale manu. O i'inei na fanau ai Keriso.

Na amata mai i le taimi lenei le fa'amatalaga a Sagato Mataio i lana evagelia ua faitauina i le Misasa o le asō. Ua ia ta'ua maia o le Ali'i na fa'afuase'ia ona fa'aali iā Iosefo i le miti, "Tula'i ia, ina ave le tama itiiti ma lona tinā, ma sosola i Aikupito, ma nonofo ai se'ia ou fai atu iā te oe; auā o lea sa'ili Herota i le tama itiiti ina ia fasioti iā te ia (Mataia 2: 13).

Na usita'ia e Iosefo le fa'atonuga a le Ali'i. A tatou manatu ia Iosefo a o tapena ni nai mea totino a latou sa i ai ma Maria o ti'eti'e i le asini, taofiofi le Keriso i ona lima. O Aikupito sa avea ma nu'u e masani ona sulufa'i i ai tagata Iutaia mai taimi a le au Makapaio, o e na sosola i ai ina ua pulea e Eleni Palesitina. Ona o malaga talu ai a tagata sulufa'i, o tagata Iutaia sa masani ua aumau i le tele o 'a'ai ma nu'u a Aikupito.

O le sosolaga mai Palesitina aga'i atu i Aikupito o se malaga faigatā tele. E masani nai aso e ui atu ai i le toafa. O i'ina e feiloa'i atu ai i le vevela o le lā i luga o oneone o le toafa ma po malulū e susū i le sau. O faigamalaga atu i le toafa o lona uiga o se malaga umi i le va o vai 'eli po nai vai tafe laiti e mafai ona feinu ai.

E le o ta'ua mai e le tusitusiga pa'ia le fa'aanu'ua a le Aiga Pa'ia i Aikupito. Tatou te iloaina le nofoaga sa nonofo ai pe o le a fo'i le umi. O se fa'aailoga sili e maua mai ia Sagato Mataio i le evagelia o le asō, ua ta'ua maia o Iosefo sa nofo ai i'ina se'ia maliu Herota. O le au tusitusi tala fa'asolopito na manatu na maliu o ia i le 4 o tausaga talu ona fanai mai Keriso. A o i ai o ia i Aikupito e manatu sa nofo ai Iosefo i se 'a'ai ma faia ai lana matafaioi o se kamuta.

Ua oti Herota, fa'auta, o le agelu a le Ali'i ua

fa'aali mai iā Iosefo i le miti, "Tula'i ia, ina ave le tama itiiti ma lona tinā ina o atu ia i le nu'u o Isaraelu; auā ua oti e na sa'ili le tama itiiti e fasioti" (Mataio 2: 19). Na toe usita'ia e Iosefo le fa'atonuga a le agelu.

Sa pulea e le Tupu o Herota Palesitina atoa, ae o se malō ua sili le telē mo Roma e tu'u i se tasi e to'atasi e pulea. Sa ia iloaina fo'i e leai ma se tasi o lana fanau tama e mafai ona fa'atagaina ona pulea lenei nofoaga tele. Sa ia vaevaeina lona malō i lana uili, tofu ona atali'i e to'atolu ma se vaega o le atunu'u. Sa ia tu'uina atu Kalilaia i lona atali'i o Herota Anetipa, le itū i matū o Palesitina ia Filipino, ma Iutaia ia Herota Arekilao. O Arekilao o se tupu sauā tele, na sili atu le leaga i lo lona tamā. I lona tula'i mai i le pule sa ia fasiotia e tusa ma le tolu afe o tagata Isaraelu i Iutaia sa fa'alogotele i ai tagata. Na fa'atagaina e Roma o ia e pulea na o ni nai tausaga ona latou fa'aunu'ua lea o ia i nu'u i matū.

Sa mata'u Iosefo e nonofo ai i lalo o pulega a Arekilao o se tupu e sauā tele; ma na toe lapata'ia o ia i se miti e malaga atu i se vaega o Kalilaia. O i'ina sa nonofo ai i le taulaga na ta'ua o Nasareta. I le sosola 'ese mai Aikupito na fa'ataunu'uina ai e Iosefo le valo'aga a Mose mai le Feagaiga Tuai.

O le olaga a Iosefo na ta'ita'ia e fa'atonuga mai le lagi. Sa mua'i fa'atonu e le agelu e 'aua le fefe e ave Maria o lana avā. O le fa'atonuga lona lua i Petele'ema na lapata'ia o ia e sosola atu i Aikupito. O le fa'atonuga lona tolu i Aikupito ua fa'atonuina ai o ia e toe fo'i atu i Isaraelu, ma le fa'atonuga nonofo i Kalilaia. Sa talia ma le fa'atuatua e Iosefo nei fa'atonuga mamana ma usita'ia e aunoa ma le fisiliagia.

E le o ta'ua maia e tusitusiga pa'ia mea na tutupu i olaga a le Aiga Pa'ia i Nasareta. Sa leai ma se isi tala e uiga ia i latou se'ia ta'ua le leiloa o Keriso i le malumalu i le sefululua o ona tausaga. Mulimuli mai ai lenei mea e tasi na tupu e le'i toe mauaina se tala e uiga i le Aiga Pa'ia se'ia taunu'u i le taimi na amata ai le galuega a Iesu i le tolusefulu ai o ona tausaga.

O le Aiga Pa'ia o se fa'ata'ita'iga lelei mo aiga uma e mulimuli i ai. I le usita'ia e Iosefo ma Maria i fa'atonuga a le Atua, e tatau i matua uma ona usita'ia Poloa'iga e Sefulu a le Atua ma tulafono a le Ekalesia. E tatau i matua uma ona a'oa'o mai ia Maria ma Iosefo o ni fa'ata'ita'iga lelei e avatu

ASO SA I LE UMA O LE KILISIMASI

(AIGA PA'IA)

ia latou fanau. O Keriso fo'i a o tamaitiiti o ia na avea o ia ma fa'ata'ita'iga o le usita'i lelei sa ia avatu ia Maria ma Iosefo. Sa ia usita'ia i la'ua a o avea o ia ma sulii o le Aiga Pa'ia i Nasareta. Sa ia usita'ia le finagalo o lona Tamā i le lagi a o i ai i le lalolagi nei.

Ua fa'aailoa mai e Keriso ia i tatou le taūa o le olaga fa'aleaiga e ala i lona olaga i lalo nei. Sa fa'aalu na o le tolu tausaga o lona soifuaga i lana galuega tala'i, ae sa fa'aalu le tolusefulu, fa'asefulu le umi, ola ai o se sulii a le Aiga Pa'ia.

Ia avea le Aiga Pa'ia o ni fa'ata'ita'iga a o tatou fo'i aiga. Ia tatou faia sulii o le Aiga Pa'ia o ni fa'ata'ita'iga e ola ai. Ia avea le alofa e ola ia outou aiga e pei ona i ai i le aiga o Iesu, Maria ma Iosefo. O le fiafia moni o le ulufale i olaga o aiga i se tulaga e fa'aa'oa'o ai i le Aiga Pa'ia. Fa'amanuia le Atua ia outou uma ma a outou aiga.

FA'AFETAI MAI LE KOMITI FA'AFOE A LE KAPELENISIA SAMOA

Ua pa ti fataloto, ae le pa ma'a te'evao, auā ua ē le manulagi, ae sa'o le afa ole lupe-malie. O lenei ua vagana i tupua le taulafoga nai atua, ae ua tutupu matagi i liu o va'a e pei o le upu ile va'a o Pualele. Ioe, se ua fia gagana le fau gagana, o lagona ole fia faafetai ma ua le fa'aumuvaoina pe matou te falelaloina le Alofa taumasuasua ole Atua, aemaise lo outou faiva o tapua'iga a'o pale-feagai a outou auauna ma galuega faatinoina mo le tatou Kapelenisia Samoa i lenei fo'i Tausaga 2022, ua toe nei o se āna 'ona tatou fa'amavae atu loa lea i ai. Ole ala lea ole tau fa'aile ole lupe nai le fuifui, ma ua afua ai fo'i ona gagana a outou auauna fa'atauva'a, auā le viiga ole Atua Silisili, o ia lava sa na puipui 'au lo outou soifua ma lo matou ola a'o faimalaga mai lo tatou Sa ile nei Tausaga umi. O lea e momoli atu ai le faafetai tele i lau Afioga Katinale John Dew, Lau Afioga Akiepipoko Paul Martin, a outou Afioga i ositaulaga aemaise le Paia ile Aufaigaluega ma Faletua. Sa outou foa le ata ole vaimanino auā le alofa laveai ole Atua, e ui lava ina sa luagia ile efu ma tau mate i le 'ete pe tua mani a lenei Tausaga, peita'i ua tatou siva nei i lagitau ona o la outou tapua'iga mau ma le tatalo faatauanau. Tau ia 'ina ia pulafia pea e le mana ole Agaga Paia la outou Tofa tatala e saga mailei ai pea ni agaga se tele mo le Atua ma lona Malo.

Faafetai tele atu ile nofo a nofoa ma Ofisa uma o Aulotu, taitaifono ma laulau o mafutaga taitasi uma ole tatou Kapelenisia. Malo le galulue, faafetai le alolofa i le Atua. Ole upu moni, ua mama avega si'i ona o lo tatou mulumu aufoe faatasi.

E le mafai fo'i ona vaea le fala o'oto ile tapua'iga a nai o tatou matua tausii ma matua matutua o lo'o po mai pea le fala ma feula muli-la a'o feagai a outou auauna ma galuega o lenei Tausaga. E mamana la outou tapua'iga ma la outou tatalo.

Le lasilasi ole tatou Kapelenisia aemaise le tapua'iga a Aiga faapea fo'i uo pele ma e masani. E le tauilo faiva o tapua'iga..Mo le tatou au faitau ole tatou auaunaga lenei ole Taulogologo faafetai tapua'i.

O upu masani a le Atunuu, e le 'asa faiva ma ona ma'imau. Ole a so matou faaletonu, e manatu o le a va'a tele i so outou agaga faatamali'i. Faamagalo ni lape ole auaunaga.

Faata'i ia ma so matou Leo. Alofagia e le Alii lo tatou faatalitali atu faaleagaga, i le faamamaluga o lona toe soifua mai faaleagaga mo oe,mo a'u, mo i tatou uma, e ala i le Pepe o IESU.

Ia maua e'i tatou uma lava le OLIOLI, le FILEMU, ma le ALOFA tunoa o IESU meamea le PEPE OLE KIRISIMASI.

Manuia le KIRISIMASI ma le TAUSAGA FOU ..

Alofa'aga ma Faamanuiaga

KOMITI FA'AFOE

17. I le Evagleia Mareko, ua tatou maua i ai se ali'i o lē e fa'alogo iā Iesu o tautala i poloa'iga, ua fa'apea mai, "Le a'oa'o e, ua ou tausia na mea uma, talu ina ou itiiti" (10: 20). Ua uma fo'i ona fai mai ai le fai Salamo: Auā o oe lava o lo'u fa'amoemoega, le Ali'i e, o lo'u fa'atuatuga... Le Atua e, na e a'oa'o mai iā te a'u talu ina ou tama itiiti; ua o'o mai fo'i nei ona po ua ou fa'aali atu ou vavega" (Salamo 71: 5, 17). E lē tatau ona tatou salamō i le fa'aaluina o taimi a o tatou talavou ma ave ma ni tagata lelei, tatala atu o tatou loto i le Ali'i, ma ola i se olaga 'ese. E leai ma se vaega o nei mea e ave'esea ai o tatou talavou ae ua na ona fa'amalosia ma fa'afouina ai: "O lē fa'afouina lou taule'ale'a fa'apei o le aeto" (Salamo 103: 5). Mo lenei mafua'aga na tagi ai Sagato Aukusitino e fa'apea: "Talu ai nei na ou alofa iā te 'oe, lalelei mai anamua, i taimi uma lava e fou! Talu ai nei na ou alofa iā te 'oe!" Ae o lenā ali'i mau'oa, sa fa'atuatua i le Atua i lona talavou, na tu'uina atu ni tausaga ua pasi atu e ave'esea ana miti; sa ia mana'o e taofiofi pea i ana 'oa (cf. Mareka 10: 22).

18. I le isi va'aiga, i le Evagelia a Mataio ua tatou maua i ai se ali'i talavou (cf. 19: 20. 22) na alu atu iā Iesu ma fesili, 'se a se mea o toe ou te le'i faia' (v.20); o i'inei o lo'o fa'ailoa mai ai o le agaga tatala atu taule'ale'a o lo'o sa'ili ni tafa'ilagi ma ni lu'i tau fou. Ae o lona agaga e lē talavou ona ua pipi'i i le 'oa ma le olaga lelei. Sa fai mai e mana'o i se mea e sili atu, ae ina ua fai atu Iesu ina ia agalelei ma tufatufa atu ana 'oa, sa iloa e lē mafai ona avatu fua mea uma sa iā ia. I

le i'uga, "ua fa'alogo le taule'ale'a i lea upu, ona alu 'ese ai lea o ia ma le tigā" (v.22). Ua ia tu'uina atu lona tofi taule'ale'a.

19. O lo'o talanoa mai fo'i le Evagelia e uiga i se fa'apotopogoga o ni fafine, o lo'o sauni ma fa'atalitali, a o isi ua fa'alavelave ma tulimomoe (cf. Mataio 25: 1 – 13). Ae o le mea moni lava e mafai ona fa'aalu taimi o tatou talavou e fa'alavelave, faia le lelei o le olaga, tautulimomoe, lē mafai ona faia ni mafutaga lelei ma le aogā po o le iloaina o le uiga loloto o le mea o lenei olaga. I lenei faiga ua mafai ai ona tatou fa'avaeina se lumana'i lē tauoloa ma le fa'atauva'a. Pe e mafai ona tatou fa'aalu o tatou talavou i le fa'anaunau i mea tetele ma le matagofie, ma fa'aputu ai se lumana'i's e tumu i le ola ma le 'oa mai totonu.

20. Afai ua mou atu lou malosia, o au miti, o lau naunauta'iga, ou fa'amoemoega ma lou agalelei, o Iesu ua tu i ou luma e pei ona tu i luma o le tama ale fafine ua oti lona to'alua, ma le mana o lona toetū na vala'au atu ai: "Le taule'ale'a e, ou te fai atu iā te oe, ina tula'i ia!" (Luka 7: 14).

21. Ina ia mautinoa, e tele nisi faitauga o le upu a le Atua e mafai ona fa'ailoa atili mai i lenei taimi o lou olaga. O le a tatou va'aia i nisi o mataupu o lo'o mulimuli mai.

O IESU E TAULE'ALE'A LAVA

22. O Iesu e "talavou fa'atasi ma le au talavou ina ia ave ma fa'ata'ita'iga mo talavou ma fa'apa'ia iā i latou i le Ali'i". Mo lenei mafua'aga ua fai mai le

Sinoti "o le talavou o se mua'i vaega ma le tulaga fa'aosofia o le olaga, sa o'o fo'i i ai Iesu, ma fa'apa'iaina."

O LE TALAVOU A IESU

23 O le Ali'i "ua tu'uina atu e ia lona agaga" (cf. Mataio 27: 50) i luga o se koluse po ua tolugafulu ona tausaga (cf. Luka 3: 23). E taūa le manatu o Iesu sa ave fo'i ma talavou. Na foa'i lona ola ina ua, e pei ona tatou va'ai ai i aso nei, o se talavou matua. Na amata lana galuega tala'i i le taimi taūa o lona olaga, ma fa'apea ai ona "pupula atu le malamalama" (Mataio 4: 16) o le a susulu malosia atu ina ua ia foa'i atu lona ola i le fa'ai'uga. O lenā i'uga e lē o se mea na ona tupu: ae o lona talavou atoa, i taimi uma, o se sauniuniga taūa tele. O mea uma ile olaga o Iesu o se fa'ailoga o lana misitelio. O le olaga atoa a Keriso o se misitelio o le fa'aolataga.

24 E lē o ta'u maia e le Evagelia se fa'amatalaga iā Iesu a o tama itiiti, ae o lo'o fa'amatalaina ni mea sa tutupu i lona taimi o talavou ma taule'ale'a. Ua fa'atuga e Mataio le taimi o le talavou a le Ali'i i le va o mea e lua na tutupu: le toe fo'i atu o lona aiga i Nasareta i le uma o le fa'aanu'ua, ma le papatisoga o Iesu i Ioritana, le amataga o lana 'au'aunaga fa'alaua'itele. O ni va'aiga mulimuli o Iesu mo tatou a o tama itiiti o se pepe sulufa'i i Aikupito (cf. Mataio 2: 14 – 15) ma le toe fo'i i Nasareta (cf. Mataio 2: 19 – 23). O la tatou va'aiga o Iesu o se taule'ale'a o lo'o fa'ailoa mai o ia o tutū fa'atasi ma le motu o tagata i le auvai o Ioritana ina ia papatisoina e lona aiga o Ioane le Papatiso, e pei lava o se isi

suli o ona tagata (cf. Mataio 3: 13 – 17).

25 O le papatisoga o Iesu e lē pei o tatou papatisoga, ua fa'aioa i tatou i le olaga o le kalasia, ae o se fa'apa'aina ae le'i amataina lana tala'iga tele a lona olaga. Ua fai mai le Evagelia i lona papatisoga na olioli le

Tamā ma fiafia lelei: “O lo'u atali'i pele, ua ou fiafia lava iā te oe” (Luka 3: 22). Na va'aia Iesu ua fa'atumulia e le Agaga Pa'ia, ma na ta'ita'ia e le Agaga Pa'ia i le toafa. O i'ina sa tapena ai e alu atu ma tala'i ma faia vavega, ma aumai le sa'olotoga ma le fa'amalologa (cf. Luka 4: 1 – 14). So se tagata talavou lava ua

vala'auina mo le misiona i lenei lalolagi ua vala'uina e fa'alogo i le Tamā o tautala mai i upu na i lona loto: “O 'oe o lo'u atali'i pele” ...fa'aauau pea...

Galuiega ale Au aposetolo (*fa'auaau m,ai loniga talu ai*)

MO TUPULAGA TALAVOU MA LE NUU ATOA UMA O LE ATUA

O le Tala'iga a Paulo i Tulu'iga o le Lalolagi

Galuega 15: 36 – 28: 31

O faigamalaga o lo'o fa'amatala i le Galuega 16 – 20 ua a'afia ai nisi o faigamalaga manino e lua, le lua ma le tolu o malaga tala'i a Paulo (ma uō). Ma o nei malaga ta'itasi e i ai ni va'aiga fa'apitoa fa'apitonu'u: e pei ole lauga muamua i le fa'apotopotoga i Kalatia i saute, lona lua na fa'a'auto i 'a'ai tetele i Maketonia ma Eleni ma le 'a'ai lona tolu e i totonu o, ma susulu mai, Efeso le maoa'e.

E pei o le ulua'i malaga na fa'amatalaina i mataupu 13 – 14, o le lona lua ma le tolu na amata ma toe fo'i i Siria Anitioka ma a'afia ai se lauga tele a Paulo – pau lea o le lauga i Tagata i Nu'u 'ese na maimoa ai (20: 18 – 35). Ae ona o nei faigamalaga e lua ua fevaeae'eseina e ni malaga pu'upu'u e lua i Suria Anitioka (18: 22), atonu e mafai ona fesoasaoni (pe fa'atuatua tele le fa'amatalaga a Luka) in ai amafaufau i gaoigaga ua fa'amatala i nei mataupu e lima o se misiona i tagata Eleni. Fa'atasi ai, o nei malaga ua fausia atoa ai le malaga mai e pei ona fa'amatalaina e Paulo lava ia o se “amataga o le evagelia” i Filipi (Filipi: 4 15) “i le uili ma le molimau mulimuli” a Paulo na fai atu i le au matutua a Filipi (Galuega 20: 17 – 38). O vaega o totoe a le tusi (Galuega 21 – 28) o se fa'afalepuipui ma “fa'amasinoga” i Ierusalema ma Kaisara Maritima, ma mulimuli lava le taofia fa'afalepuipui i lona ia lava fale i Roma.

15: 36 – 41 Ua tu'u'ese'eseina Paulo ma Panapa

O le faia ma le faa'eteete o felagolagoma'i i le va o fuafuaga a le tagata ma le mamana o le a fa'aauau ona talatala ma le mata'iga. O le mea o le a avea mafa'alauteleina maoa'e o le tala'iga a Paulo na amata i le fa'anaunau o le toe asiasia ma fa'amalosia ekalesia sa ia fa'avaeina i lana misiona muamua (Galuega 13 – 14). Ona o le Atua e mafai ona galue ma taunu'uga a le tagata vaivai o lo'o fa'aali mai i le fa'aaliga a Luka o Paulo ma Panapa sa i ai so la'ua fe'ese'ese'iga e uiga ia Mareko, o lē na tu'ua le misiona muamua i Pafulia, pe tataua ona latou malaga fa'atasi. O le fevaevae'i muamua lenei o le vaega muamua na mafua ai le fa'avaeina o se vaega fou malosi – Paulo ma Sila. Na mua'i fa'aioa mai i le fuaiupu 22 – 32 o se ta'ita'i i le fa'apotopotoga i Ierusalema ma se perofeta, o Sila e masani ona va'aia o le tagata lava e tasi ma Suliano o lo'o ta'ua i tusi a le Feagaiga Fou.

16: 1 – 5 Ua fa'atasi atu Timoteo ma Paulo ma Sila

O le faitauga pu'upu'u ua fa'aioa ai le 'ese'esega o le feiloa'i atu a Paulo i tagata Iutaia ma tagata mai nu'u 'ese ma la latou va feagai ai ma le tala'iga Kerisiano. E ui lava na ia fa'auauina le folafolaina atu o le fa'atonuga fa'aaposetolo a le Fono Aoao a Ierusalema (15: 23 – 29) na fa'asa'olotoina ai tagata o nu'u 'ese ona liliu mai le avea ma tagata Iutaia, ae sa mafai lava e ia ona finau o Timotea ia faia le peritomeina fa'atagata matua. Ae o Timoteo na ola a'e o se Iutaia na tausia e lona

Galuiega ale Au aposetolo (fa'auaau m,ai loniga talu ai)

tinā lutaia (e igoa ia Eunike, 2 Timoteo 1: 5) ae e le'i peritomeina lava (taofia e lona tamā Eleni?). Ona sa taua-nauina o ia e Paulo e faia le peritomeina, e ui o lenei ua avea o ia ma Kerisiano, ua tā'u mai ai o Paulo o lo'o fuafuaina le tala'iga i tagata lutaia e taūa tele e faia ai lenei auala ina ia talia lelei ai Timotea e ona uso lutaia.

O le malaga a Paulo i Maketonia

O le gaiou atu a lenei vaega e to'atolu i se tala'iga i se nofoaga fou ua toe aumai ai le fa'aoga ma'ale'ale o le mamana ma le tagata iā latou fa'ai'uga - fai. A o latou malaga atu i sisifo, ua taofiofia i latou i le malaga atu i saute e le Agaga Pa'ia fa'apea le malaga atu i matū e le "Agaga o Iesu. Ina ua talia e Paulo se va'aiga fa'amiti o se vala'auina mo se fesoasoani a Maketonia, o lenā vala'au e mana'omia ai se fa'asa'oga i filifiliga a le tagata (v.10).

O se upu i le fa'aupuga "matou"

O le fa'aailoaina mai o le tagata muamua e to'atele ("matou") i le fuaiupu 10 ua fa'ailoa mai ai le ulua'i o le to'afa ta'uta'ua "matou" i vaega i le Galuega (16: 10 – 17; 20: 5 – 15; 21 : 1 – 18; 27: 1 – 28: 16). O se fa'amatalaga mo lenei fa'alavelave, o le 'au tusitala ua maitauina o le tagata muamua ua fa'ateleina fa'anumerā o nisi o taimi sa fa'aogaina i fa'amatalaga anamua i faigamalaga o se faiga o tusitusiga ua vave ona fa'aosoina. Ae ui i lea, e le o foliga mai o se faiga lenei a Galuega, o se galuega o le tala'aga.

TUSI FA'A-APOSETOLO—*DESIDERIO DESIDERAVI* A LE TAMA FALANISISI (fa'aliliuina Lauano A. Ilaoa)

Ole fa'auaauina atu lenei ole Tusi Fa'a- ole sauniga. Ole fa'afitauli e mafuli lava i uiga Aposetolo mai lana Afioga ile Tama Paia, ia fa'a-ekalesia. Ou te le mailoa pe fa'apefea ona Pope Falanisisi, e pei ona gata mai ile lomiga ua fa'apea mai se isi, e tataua ona amana'ia le taūa mavae.

(Mai le lomiga o Novema)

31. O lenei tusi, e matua tele le tamaoiga o iai i fa'apea foi ona ia le taliaina ia suiga ole faiga o nisi o ona fa'aupuga, e faigata ia te a'u ona saga tapua'iga ia na fanau mai ile Sacrosanctum Con- talanoa fa'aumiumi iai, ae oute fautuaina le cilium, o se tusitusiga aloaia o loo fa'amatalaina taatia atu ile tagata ia e saga mafaufau loloto ma ai auiliili le moni ole Tapua'iga ma lona sootaga metitasio iai. Afai ole tapua'iga, ole "tumutumu ma le fa'amoemoe ola ole Ekalesia, e pei ona mauga lea o loo taula'i iai galuega a le Ekalesia, fa'amanino mai ile Lumen gentium. Ole mafu- ma ole vaipuna foi lea o loo tafe mai ai lona a'aga lea, e pei ona ou muai tusi atu ai ile au malosi'aga," (Sacrosanctum Concilium, n. 10), o epikopo, ua ou manatu ai o lo'u tiute le saga lona uiga la, ua mafai ona tatou malamalama ile faamautuina o "Tusi mo tapua'iga, e pei ona mataupu e tusa o tapua'iga ma sauniga lotu. E le fa'atagaina mai e Sagato Paulo VI ma Sagato taua le faitau i faafitauli, ua si'omia ai le patipati- loane Paulo II, e tusa ai o le agaga ole poloa'iga ga ole tapuaiga, o se suiga faigofie ile va o fa'al- mai le Fono Aofia ole Vatikano II, o fa'amaumau- ogona 'ese'ese ile fa'atinoina o se vaega patino ga aloaia ole fa'atinoina ole *lex orandi* ole

TUSI FA'A-APOSETOLO—*DESIDERIO DESIDERAVI* A LE TAMA FALANISISI

faasologa faa-Roma o sauniga” (Motu Proprio *Traditionis custodes*, art 1)

Ole te'ena ma le lē taliaina o suiga ole faiga o tapua'iga, e pei foi o se manatu mama iai, e afaina ai lo tatou taumafai e sa'ili se tali ole fesili lea ou te mana'o e toe tuuina atu: e fa'apefea ona o tatou fa'atupula'ia lo tatou mafai ona olaina ma le ato'ato'a le fa'atinoina o le tapua'iga? E fa'apefea ona tatou mafai ona fa'aauau ona tatou maofa ile mea e tupu i le patipatiga tatou te va'ai tino iai? E mautinoa lava lo tatou mana'omia o se a'oa'oga anoa i le faiga ole tapua'iga.

32. Tatou toe foi atu la ile 'a'ai o Ierusalem. Ole taeao ole Aso Petenekoso, lea na fanau ai le Ekalesia, ole uluai mafutaga lea o le tagata fou . E na o le mafutaga o alii ma tamaitai, ua tuufaa-tasia ona ua fa'amagaloina, ua ola ona o la o loo soifua, e moni aua o loo afio ai totonu le Agaga - e mafai ona tatalaina le vaapiapi o talitonuga faaleagaga o tagata ta'ito'atasi.

33. E na ole mafutaga ole Penetekoso e mafai ona vavaeina le Falaoa ina ua mautinoa o loo soifua le Alii, na toetu mai le oti, o loo auai i lana 'upu, o ona uiga fa'aalia, faatasi ma le taulaga o lona Tino ma lona Toto. E amata mai lea taimi le ta'ua ole patipatiga – e ui ina e lē na ole pau lea – o taimi e feiloai ai ma la. Ua tatou iloa lea itu, faafetai i le kalasia o lea feiloaiga, ua atoatoa ai le tamaliiaga ole tagata. E na ole Ekalesia ole Penetekoso e mafai ona fanau mai ai le tagata o se tagata soifua, ua matua tatala lona vafeagai ai ma le Atua, ma le foafoaga, faatasi ai ma ona uso ma ona tuafafine.

34. O ia tonu lea e tulai mai ai le fesili ta'ua e uiga ile a'oa'oina atoatoa ile faiga o le tapua'iga. Fai mai ia Romano Guardini, “O i foi lea o loo iai le mea muamua e tatau ona fai: e tauaveina ile fa'aliliuina o lo tatou taimi, e tatau ona tatou

a'oa'oina ma fa'afou le faiga e fesoota'i ai fa'aleagaga ia tagata soifua.” [8] O lea tulaga e mafai ona faatinoina e le Tapuaiga. E manaomia ai i tatou ona a'otauina lelei ai. E le o fa'alufesasi foi le fa'ailoa mai e Guardini, e fa'apea, a aunoa ma la a'otauina lelei, “ole a le iai se fesoasoani tele e mafai ona maua mai i le fa'asologa ma ni suiga ile fa'aupuga ole faiga o le tapuaiga” E le o iai sou manatu e saga fa'amafaina iinei, le tulaga ta'ua tele a'oaina atoatoa ole faiga ole tapuaiga. Ae na o lo'u fia tu'uina atu o ni nai vaega amata e manatunatu ma mafaufau iai. Ou te taofi e lua a ni vaega e tatau ona faatāuina: ole a'oa'oina atoatoa ole Tapua'iga, ma le a'oa'oina lelei e le Tapua'iga. Ole vaega muamua e fa'alagolago tele ile vaega e lua, o se mea e lē ma'alofia.

35. Sa mana'omia, ma o se tulaga e tatau ona faia, le sailia lea ia maua o ni auala mo le a'oa'oina lelei ai o le Tapua'iga. Mai lava ile amataga ole faasologa ma le faiga ole Tapua'iga, e tele tulaga fa'apea ua faia, e aofia ai le sao ta'ua mai le au su'esu'e ma a'oga ma fa'alapotopotoga mo le sailiga ole atamai. Ae ui o lea, e taua pea ile taimi lenei, ona fa'alauteleina atu o lea silafia i tua atu o le siosiomaga faalea'oa'oga, i se faiga e maua gofie ai, ina ia mafai e tagata uma ole au faatuatua ona saga faateleina ai lo latou silafia i le tulaga moni faatelosia ole Tapua'iga. Ole fesili tupito lea ma e taula'i iai soo se ituiga o malamalama'aga ma le fa'atinoina o le Tapua'iga. E le gata i lea, ae ole taula foi lea ole patipatiga ole Tapua'iga, e fesoasoani ai i tagata taitoatasi ma tagata faatasi ina ia manino ma malamalama atoatoa i tusitusiga paia, ma le taua o vaega 'ese'ese o sauniga, ma le uiga moni ma le mafua'aga mai anamua.

36. Ou te manatunatu pea ile tulaga o a tatou

TUSI FA'A-APOSETOLO—*DESIDERIO DESIDERAVI* A LE TAMA FALANISISI

mafutaga ma faatasiga faifaipea pe a potopoto e patipatia le Eukalisitia ile Aso ole Ali'i, ilea Aso Sa ma lea Aso Sa, ma lea Eseta ma lea Eseta, atoa ma nisi o taimi fa'apitoa ole soifuaga o tagata ta'itoatasi ae fa'apea nu'u, i vaega 'ese'ese uma ole soifuaga nei. E fa'atino e le au ositaulaga le tiute fai muamua fa'aleoleomamoe, e auala ile taita'iina ole lima o le au fa'atuatua ua papatisoina agai atu ile Misitelio ole Paseka. Ia tatou manatua pea i taimi uma, ole Ekalesia, le Tino o Keriso, ole autū lea ole fa'atinoga ole patipatiga, ae le na ole faifeau. Ole ituai-ga o tomā e maua mai ile a'oa'oina ua na ole fasitepu muamua lea, e mafai ai ona ulufale atu i totonu ole misitelio o lo'o patipatia. O lona uiga, ina ia mafai ona ta'ita'i i o latou uso ma tuafafine, e tatau i faifeau fa'auuina e taiulu i se sauniga, ona o latou iloa lelei ma malamalama i le fa'atinoina, ina ua uma ona o latou a'oa'o iai, ile fa'afanua o a latou suesuega fa'atelosia, atoa ai ma le tele o taimi ua o latou faatinoina ai le tapua'iga, ma le olaina ole fa'atuatua, e fagaina pea ile tatalo – ae le na o se mea e tau ina faataunu'u. Ole aso o lona fa'auuga, e fa'alogō ai le faifeau fou o fa'apea mai le epikopo, "Ia e malamalama ile mea ole a e faia, fa'atino le mea ole a e patipatia, ma ia tausisi lou olaga ile misitelio ole Koluse ole Alii" [10]

37. E fa'apea foi i fuafuaga mo le a'oa'oina ole Tapua'iga i totonu o seminalio aofia ai le tulaga'ese olea patipatiga e auala mai ai se ata mausali o le atamai uma fa'atelosia. O vaega ta'itasi uma ole telosia, mai ona uiga taitasi, e tatau ona atagia ma fa'aalia manino ai lona so'otaga vāvā lalata ma le Tapua'iga, lea o loo manino ma maioio mai ai le maopopoga o le a'otauina ole tagata ile tofi ositaulaga (cf. *Sacrosanctum Concilium*, n. 16). O se fuafuaga atamai mo le aoaoina o le tapuaiga i totonu o seminalio, e tatau ona iai ni a'afiaga lelei i galuega fa'atino o

a'oa'oga fa'aleagaga. E leai a se vaega ole soifuaga fa'a-ekalesia e le maua mai lona tumutumuga ma lona fa'apogai mai le Tapua'iga. Ole fa'atinoina ole galuega faufautua fa'aleagaga, e le mafua ona o se polokalame, ua ato'ato'a ma mautu lona fausaga, ae o le taunuuga ole aveā ole Eukalisitia ole Aso Sa, le faavae ole komuniō, e fai ma ogatotonu ole ola ma le soifua o tagata. Ole malamalama'aga fa'atelosia ile Tapua'iga, e le mafai ona faatagaina ai upu nei ina ia faauigaina ina ia tuuititia ai mea uma e tusa ole agaga tapua'i. O se patipatiga e aunoa ma se fa'aevagelia e le sa'o, e fa'apei o se poloa'iga e le maua ai se feiloa'iga ma le Alii toetu, i lona fa'atinoina. O mea uma ia e lua, a aunoa ma le molimau ole alofa, ua le 'ese ma se mea ta'alili po o se sumepalo tagitagi. (1 Kor 13:1).

38. Mo ositaulkaga fa'apea ai foi ma e ua papatisoina, ole aoa'oina lelei ile tapua'iga, i lona vaega muamua lenēi, e le o se mea e mafai ona maua i le taimi e tasi ona muta ai lea. Talu ai ona ole meaalofo o lenēi misitelio e pei ona patipatia ai, e le oo iai lo tatou malamalama, o lona uiga o lenēi taumafaiga e tatau lava ona o faatasi ma le aoa'oina tumau o tagata uma, faatasi ai ma le loto maualalo ma le loto mama fa'apei o tamaiti, lea e mafai ona talai ai avanoa mo mea e silisili e maofa ai.

39. O se lagona faaiū e tusa o seminalio: e fa'aopoopo i se polokalame faataatia mo le a'oa'oina ole tapuaiga, le tatau lea ona maua ole avanoa e a'oa'o ai i se patipatiga tulaga'ese i lona faatinoina, ae o se tulaga foi e moni ma taolaola, lea e maua ai se olaga mafuta faatasi ma le Atua, le mafutaga mafana lea e tatau ona maua mai le atamai ma le iloa fa'atelosia. E na o le mana ole Agaga Paia e mafai ona maua ai se faaiuga mo lo tatou iloa ma le malamalama ile misitelio ole Atua, aua ole misitelio ole Atua, e le o se fesili mo se mea e mafai ona

TUSI FA'A-APOSETOLO—*DESIDERIO DESIDERAVI* A LE TAMA FALANISISI

maua fa'alemafaufau, ae o se vafeagai ma se patipatiga ole tapua'iga. E oo lava ile poto ma va fealoaloai e a'afia ai le soifuaga atoa. O ia le atamai e maua mai i a'oa'oga ma tulaga, e matuā taūa tele, auā ole taimi e iu ai su'esu'ega, lea sa ou ta'ua, e tatau ona ma avea le tagata seminalio ma ositaulaga mautinoa ai le tulaga taūa tele ole tapuaiga faauuina, e mafai loa ona o latou malaga faa- mo tagata uma e talitonu ma faatuatua ia tasi ma tagata o le nuu i le faigamalaga e tasi Keriso.

ole iloa ma le malamalama ile misitelio ole **(E Faia Pea)**
Atua, ole misitelio lava lea ole alofa tunoa.

40. O le vaega faai'u e mafaufau iai, ole tomanatu lea ile vaega e lua ole tatou iloa ma le malamalama'aga ile fa'aupuga "a'oa'oga ole tapua'iga". Ou te fia taua ai le itu e uiga ile a'oa'oina o tatou, e tusa o tatou tofiga o auauna ai, mai ile auai ma le faatasia ile

FAITAUGA MO LE MASINA TESEMA— 2022 – TUSAGA A

FAITAUGA MO ASO SA MUAMUA O TESEMA – TAUSAGA A.

Aso 4 Tesema Aso Sa 2 o le Atevetu: Faitauga Muamua: Isaia 11: 1 – 10. Matua: E fa'amasino o ia ma le tonu i e matitiva.

Salāmo: 72: 1 – 2 (tali), 7 – 8 (tali), 12 – 13 (tali), 17 (tali). Tali: O lana nofoaiga e tupu olaola mai ai lē ua amiotonu.

Faitauga Lona Lua: Roma 15: 4 – 9. Matua: Ua fa'aolaina e Keriso tagata uma lava.

Aleluia, Aleluia...Inā teuteu ia outou le ala o le Ali'i, ia fa'alaulelei ona ala. E va'aia e tagata uma le fa'aolataga mai le Atua...Aleluia.

Evagelia: Mataio 3: 1 – 12. Matua: Inā salamō ia outou, auā ua latalata mai le malō o le lagi.

Tofitofiga o le Upu:

Atonu e lē fa'ate'ia i tatou i le iloaina a tatou feiloa'i atu ia Ioane le Papatiso i le Evagelia o le vaiaso a sau sa tu'uina atu o ia i le falepuipui – ua ia iloaina lelei lava pe fa'apefea ona avea ma fili a tagata taūa, vala'auina le au Farasaio ma le au Satukaio o ni "toloa'i!" Ua fa'ailoa mai Ioane i le asō o le tasi o lo'o talanoa mai ai Isaia – ae afai tatou te va'ava'ai i mea o lo'o fai mai ai Isaia i le faitauga muamua, o se fe'au matuā lelei atoatoa, o se fe'au o le fa'amoemoe ma le fa'amafanafanaga. Ua sau Ioane ma fa'ailoa mai le Tala Lelei, o le 'malō o le lagi ua latalata ona sau ma o tatou fo'i e tatau ona talia o se Tala Lelei ma avea ma le fa'amaoni le va'aiga a Isaia, o la tatou folafolaga fo'i lenā. Ma ona ua tatou talia lenā o tatou olaga o le a atagia mai ai i lenā i auala ua tatou ola ai – o le uiga lenā o mea na fai mai ai Ioane i le gaosia o ni fua tatau. E *mafua* ona o le fa'atuatua o lo'o ola i Kerisiano e fua tele mai, e lē tumu i galuega lelei ina ia *maua* ai le ulufale atu i le malō. E masani ona tautala Paulo i le mataupu lea i ana tusitusiga ma o le mafua'aga lenā e tautala ai i folafolaga ma le fa'amoemoe i Roma, o se mea ua latou mauaina ma o se fa'amalosi'au e 'faia ai i isi e pei ona faia fa'auō e Keriso iā i

tatou.’ A tatou maua le fa’atuatua ua ia fa’aalia mai e le na o se fa’amoemoe o le a lelei mea uma lava, ae i se olaga to’aga e fua mai ai ni fua a le evagelia.

ASO FANAU O IESU – KIRISIMASI:

MISASA I LE AO

Aso 25 Tesema – Faitauga muamua: Isaia 52: 7 – 10. Matua: Ua iloa e tulu’iga uma o le lalolagi le olataga mai lo tatou Atua.

Salamo 98: 1 (tali), 2 – 3 (tali), 4 (tali), 5 – 6 (tali). Tali: Ua iloa e tuluiga uma o le lalagi le olataga mai lo tatou Atua.

Faitauga lona lua: Eperu 1: 1 – 6. Matua: Ua fetalai mai le Atua iā te i tatou e ala mai lona Alo.

Aleluia, Aleluia... Ua malama le taeao, o le aso pa’ia lenei mo i tatou; o mai ia, nu’u uma e, ia tatou ifo i le Ali’i, auā o le aso nei ua o’o mai ai le malamalama tele... Aleluia!

Evagelia: Ioane: 1: 1 – 18. Matua: Ua liu tino tagata le Upu, sa mau fo’i o ia ma i tatou, ua tatou matamata i lona mamalu.

Tofitofiga o le Upu:

Mo mafua’aga fa’alafulemū ma le aogā o le tele o palisi o le a patipatia Misasa i le vaitaimi o le Kilisimasi e aunoa ma le fa’aogaina o le anoanoa’i o faitauga ‘ese’ese o lo’o ofoina mai: e fa vaega o faitauga e a’afia ai Misasa e fa o le Kilisimasi; i le afiafi, i le pō, i le vaveao ma le Misasa i le āo. Ae ui i lea, i le tu’uina atu o le taimi e sa’iliili ai faitauga, e mafai e tagata uma ona fa’aoga le ‘oa e fafaga ai mai tusitusiga pa’ia e feiloa’i atu ai i le tele o fua o le Sulufaga o le Liutino Tagata. I tulaga o le evagelia, o le Misasa ile Afiāfi ua talosaga mai ia i tatou ina ia va’ai i le fanau mai o Iesu i le tala fa’asolopito a Isaraelu i le tala’aga o folafolaga na faia e le Atua i le Feagaiga Tuai atoa i ali’i (ma ia maitau, ma fafine fo’i) o le fa’atuatua. O le Misasa i le vaeluaga o le po ua aumaia iā i tatou le faigamalaga a Maria ma Iosefo (fa’aleo mai ai tagata fai malaga ma le au sulufa’i o nei aso) ma le fanau mai ile fale o manu. O le Misasa ile vaveao ua aumai ai iā i tatou le ‘au leoleo mamoe – o tagata i le tautafa’asi’usi’u o e na fa’ailoa atu i ai e le agelu le Tala Lelei. O le Misasa i le ao ua aumaia iā i tatou se fa’atomuaga loloto a le evagelia a Ioane – Liutino Tagata ua fa’aalia i le tala’aga o taimi uma ma avanoa uma. O faitau e fa mai le Feagaiga Tuai ua latou ofoina mai se folafolaga matagofie ma le fa’amoemoe mai le perofeta o Isaia, o se folafolaga ua avea ma tino i le fanau mai o Keriso, ae o lo’o ofoina mai ai fo’i ma le fa’amoemoe mulimuli o le iloaina mo tagata uma. O faitauga mai le Galuega, o le lua uma mai ia Paulo ma Titu, ma mai le Tusi ia Eperu o lo’o tausisi mai i le moni na faia e le Atua ia Iesu. I le avea o se taimi e tatala ai nei faitauga, o latou ua patipatia le Fanau Mai e mafai ona tomanatu i le loloto i mea na faia e le Atua, o lo’o faia, ma o le a faia iā Keriso. I lenei taimi o le tausaga e faigofie ona se’e ‘ese atu i le ‘agaga’ o le Kilisimasi e masani o le fa’anoanoa ma oloa; ae mo latou o le a potopoto mo Eukalisitia, o le Upu a le Atua ua ofoina maia se va’aiga lautele i lenei aso tele: o le fa’amanatuga ua a’apa atu i tua i le loloto o folafolaga a le Atua ma aga’i atu i luma i lona taunu’uga, e pei lava o le asō ua tatou potopoto mai e patipatia le fanau mai o le pepe i Petele’ema.

Faitauga mo le Misasa o le Tausaga Fou – 1st. Ianuari 2023

Faitauga Muamua - Numera 6: 22 – 27. Matua: Latou te ta’u atu lo’u igoa i luga o le fanauga a Isaraelu; o a’u fo’i ou te fa’amanuia atu iā te i latou.

Salamo 67: 1 – 2 (tali), 4 (tali), 5, 7 (tali). Tali: Ia alofa mai le Atua iā i matou, ma ia

fa'amanuia mai i matou.

Faitauga Lona Lua - Kalatia 4: 4 – 7. Matua: Ua o'o atu i le fa'aatoaga o tausaga, ona auina mai lea e le Atua o lona Alo, na fanau i le fafine.

Aleluia, Aleluia...O le Atua na fetalai mai anamua i o tatou tamā e ala mai i perofeta; a ua fetalai mai iā te i tatou i aso nei e ala mai i le Alo...Aleluia.

Evagelia: Luka 2: 16 – 21. Matua: Ua maua e leoleo mamoe o Maria ma Iosefa, ma le tama meamea o ta'oto i le fale manu. Ua o'o i le aso valu ona fa'aigoaina ai lea o ia o Iesu.

Epifania a le Ali'i

O le tala o le Epifania ua pu'epu'eina ai o tatou mafaufauga i lona 'oa ole misitelio ma le maofa. Na aga'i atu i le mativa ma le nofoaga e lē tumau a le Aiga Pa'ia na o mai i ai ni ali'i atamamai e to'atolu mai sasa'e 'o'ofu mai i ni la'ei tau tupu ma aumai ni mealofa o le auro, pulu lipano ma le pulu muro. Sa faimalaga mai i se nofoaga e lē o mailoa ma mulimuli i se fetū na iloaina le fa'a'ole'ole a le Tupu o Herota ae le'i fa'atumulia i latou i le fiafia i le mauaina o le pepe – fou. I le mae'a ai o la latou asiasiaga na fo'i i o latou aiga ae na sui le ala na ui atu ai.

O le tala i Makoi ua felanulanua'i e mafai ai ona tatou lē va'aia lona uiga loloto. O nei tagata atamamai o suli ia o tatou uma. O la latou faigamalaga na ala atu i le toafa ma mauga ma le mulimuli i le fetū ua atagia mai ai la tatou sa'iliga o le mafua'aga ma le uiga o le olaga, e lē taunu'u vaganā ua ta'ita'ia i tatou e le fa'atuatua ua mafai ai e tatou ona va'aia i lalo ifo o le va'aiga i mea aupito i luga. I le ogatotonu o nei mea uma le tama itiiti pepe ta'umamāina, si'osi'omia e le mamalu, le matagofie ma le misitelio, o lē ua mafai ona sa'eu lagona o tagata, mafaufauga ma manatu o latou uma ua tosiga atu iā te ia.

A o fa'asolosolo ona uma le vaitau o le Kilisimasi ma ona teuteuga, ua fa'amanatu mai iā i tatou e le Epifania la tatou malaga atu i le tausaga fou mulimulita'i le auala ua na o tatou e savalia. O le olaga o se faigamalaga, o se malaga umi, ae lē tataua ona tatou faimalaga ta'ito'atasi, alu tauto'ai i le pogisā i le sa'iliga o la tatou taunu'uga. O le tala o le Epifania e popole i ai le lalolagi atoa ma le tele o tulaga 'ese'ese o le fiafia ma le fa'anoanoa ua tatou feiloa'i atu ai iā Keriso. Ua vala'auina i tatou e va'ai ma sa'ili mo le Ali'i o lo'o fa'atasi ma i tatou, i tulaga sa tatou lē manatu i lona afio ai. Ua sau i tagata ma nofoaga tatou te lē o manatu i ai ma taimi pe a tatou lē sauniuni mo lana tausoa mai. O lo'o tu le Atua i o tatou li'o ma fa'aali mai ma vala'auina i tatou e fa'atasi atu ma ia. E lē toe tutusa ni mea mo latou ua mauaina le malamalama mamana o lo'o susulu mai iā i tatou e ala mai i isi. O le evagelia o le alofa, fa'amagaloga ma le fa'aola e lē o se mea e lē talanoa i ai, ae o le Tala Lelei e fa'ailoa atu i le lalolagi.



Faitauga mo le Misasa o le Tausaga Fou – 2023

Faitauga Muamua Numera 6: 22 – 27. Matua: Latou te ta'u atu lo'u igoa i luga o le faitauga a Isaraelu; o a'u fo'i ou te fa'amanuia atu ia te i latou.

Salamo 67 1 – 2 (tali), 4 (tali), 5, 7 (tali). Tali: Ia alofa mai le Atua ia i matou, ma ia fa'amanuia mai i matou.

Faitauga Lona Lua Kalatia 4: 4 – 7. Matua: Ua o'o atu i le fa'aatoaga o tausaga, ona auina mai lea e le Atua o lona Alo, na fanau i le fafine.

Aleluia, Aleluia...O le Atua na fetalai mai anamua i o tatou tamā e ala mai i perofeta; a ua fetalai mai ia te i tatou i aso nei e ala mai i le Alo...Aleluia.

Evagelia: Luka 2: 16 – 21. Matua: Ua maua e leoleo mamoe o Maria ma Iosefa, ma le tama meamea o ta'oto i le fale manu. Ua o'o i le aso valu ona fa'aigoaina ai lea o ia o Iesu.

20

Misasa Fa'ai'u o le 2022			
6 Tesema 2020	2.00pm	Lower Hutt	Cardinal John Dew
			<i>Concelebrants</i>
			Patele Andrew
			Patele Maleko
Misas o le Tausaga Fou			
31st. Tesema 2022	8.00pm	Lower Hutt	Cardinal John Dew
			<i>Concelebrants</i>
			Patele Andrew
			Patele Maleko

Mikaele Teofilo:



m.teofilo@wn.catholic.org.nz



+64 4 496 1707



021 0818 5037



PO Box 1937, Wellington 6140, New Zealand